

Susanne Ruoff è la nova directura generala da La Posta

DA LUCAS DEPLAZES / ANR

■ Il cussegl d'administrasiun da La Posta ha elegì Susanne Ruoff sco nova scheffa da La Posta. Ella è la successura da Jürg Bucher che va en pensiun la fin d'avust 2012. Susanne Ruoff è vegnida selezziunada or d'in grond dumber da candidatas e candidats da l'intern ed da l'extern. En in lung proceder da selezziun tranter fitg buns concurrents haja persvas *Susanne Ruoff* il meglia da tuts al cussegl d'administrasiun, ha accentuà *Peter Hasler* a la conferenza da pressa dad ier a Berna.

Cun Susanne Ruoff, che vegn da l'industria privata, surpiglia ina personalitad cun gronda experientscha en l'economia la direzziun operativa da La Posta. Ruoff dispona d'ina vasta scolaziun universitara e pratica en grondas interpresas internaziunalas. Durant ventg onns ha Ruoff fatg part dal cader tar IBM, l'ultim temp sco CEO tar British Telecom/Switzerland (BT). Grazia a sias extendidas enconuschientschas en il mund digital e la confruntaziun cun diversas culturas e mentalitads disponia ella d'ina auta cumpetenza per dumnagnar las novas sfidas da La Posta, ha punctuà Peter Hasler, il president dal cussegl d'administrasiun. Da preschent è occupada l'economia da 53 onns sco Country Manager e CEO tar BT. Sia incumbensa principala è da tgirar in stretg contact cun ils clients e l'acquisiziun da novas firmas. Susanne Ruoff è maridada, ha dus uffants ed abita a Crans-Montana en il Vallais.

Susanne Ruoff cumenza sia nova funcziun il prim da settember 2012. Durant dus mais ha ella la pussaivladad d'emprender d'enconuscher ils divers secturs da La Posta. Ruoff n'ha betg vuli prender posiziun davart l'avegnir da La Posta. Ella veglia oravant tut emprender d'enconuscher la pli impurtanta interpresa dal service public. Sin la dumonda davart ses contacts cun la politica ha ella admess che tals manchian anc. Ella vegnia senz'uter a tschertgar il contact cun



Susanne Ruoff – la nova directura generala da la Posta.

FOTO L. DEPLAZES

la politica e cun il personal, ha sincerà Ruoff.

Strategias da La Posta

Jürg Bucher, il schef operativ dal concern, ha skizzà intginas strategias per ils proxims onns. Uschia saja sin buna via la cumposiziun dals dus novs cussegls d'administrasiun, numnadamain quest da «La Posta» e l'uter per «Postfinance». La nova structura da direzziun è prevista per l'onn 2013.

La Posta disponia d'in agen chapital da passa tschintg milliardas francs e saja bain preparada per ses avegnir, senza il

sustegn da la confederaziun. Ella possa dumnagnar l'avegnir er senza il monopol per las brevs (50 g). Tenor Bucher vul La Posta intensivivar las stentas per ina buna qualitat dals servetschs e reducir ils custs sin il sector dals uffizis da posta cun installar novas agenturas ed extender il servetsch da chasa. La Posta vegnia a profitar da las pussaivladads ch'il mund digital porscha ed extender lur prestaziuns. Spezialmain per las interpresas pitschnas e mesaunas vul ella metter a disposiziun ina plattform digitala per tuts basegns cun cumbinar la posta fisica cun la digitala.